

Headlines

1. उपराज्यपाल मनोज सिन्हा होरें आखेआ जे Made in India कन्नै आलमी स्तह पर बसाह-भरोसा बधने कन्नै भारत च कम्म-रोजगार दे मौके च बी बाद्दा होग।
2. मुखमन्त्री उमर अब्दुल्ला होरें ईरान च बने दे हालात पर गैहरी चैंता जाहिर कीती ऐ।
3. पुंछ जिले च कब्जा रेखा दे पारा थमां भारती इलाके च दाखल होए दे इक पाकिस्तानी ड्रोन पर सेना आसेआ गोलीबारी कीती गई।
4. PMJAY सेहत तैहत 6 सौ छ्याठ करोड़ रुपें दे दावें गी मंजूरी दिती गेदी ऐ। मुख सचिव अटल डुल्लु होरें फर्जी ते झूठे दावे गी दूर करने लेई इक मजबूत सरिस्ता कायम करने दी जरुरतै पर बल दिता।
5. डोडा जिले च अज्ज बडुलै 4 इशारिया 2 दी तीव्रता आले भूचाल दे झटके महसूस कीते गे। जान-माल दे नुक्सान दी कोई खबर नैई ऐ।

<><><><><><>

LG Made in India

लैफ्टिनेंट गवर्नर मनोज सिन्हा होरें आखेआ ऐ जे “मेड इन इंडिया” कन्नै आलमी सतह उप्पर बसार –भरोसा बधग ते कम्म-रोजगार दे मौके च बी बाद्दा होग। एल.जी होरें एह गल्ल भारत दे फिल्म ते टैलिविजन संस्थान च आत्म-निर्भर भारत आले इक कार्यक्रम गी सम्बोधित करदे होई आखी। इस दरान एल.जी होरें घरेलू तौर पर माल तयार करने दी समर्थ बधाने पर जोर दिता ते आखेआ जे “मेड इन इंडिया” समेयान कन्नै भारत च नौकरियां बधगंन ते अर्थबवस्था मजबूत होग। उंनै आखेआ जे आत्म-निर्भर भारत इक राश्ट्री जागृति ऐ ते एह इक ऐसी आर्थिक क्रांति बी ऐ जिसी भारत दे मकामी उद्योग लगातार ताकत देआ करदे न। श्री सिन्हा होरें आखेआ जे “मेड इन इंडिया” हुन आलमी सतह दे कारोबार च विश्वास दा प्रतीक बनी गेदा ऐ। उंनै गलाया जे असेंगी एह जकीनी बनाना लोडचदा ऐ जे कोई बी जिसलै दुनिया दे कुसे बी कोने च कुसै उत्पाद पर “मेड इन इंडिया” लखोए दा दिक्खे- तां ओदे अंदर विश्वास दी मजबूत

भावना पैदा होए। एल.जी होरें घरेलू सतह उप्पर माल तयार करने लेई मय्यार- नमियें काहडें ते विश्वसनीयता आले त्रै मंतरें पर चेचा जोर दिता ऐ।

<><><><><><>

CM Iran

मुख्यमंत्री उमर अब्दुल्ला होरें ईरान च पैदा होए दे खतरनाक हालात पर गैहरी चिंता प्रगट कीती ऐ- जित्थुआं ईरान दे सबनें शां बड्डे लीडर आयतुल्लाह अली खामेनेई हुंदी मौत दी खबर आई ऐ। मुख्यमंत्री होरें सबनें समुदायें दे लोकें अगगे अपील कीती ऐ जे ओ शांति ते सदभाव बनाए रक्खन ते कुसै बी चाल्ली दी ऐसी कारवाई नैई करन जेहदे नै समाज च अशांति जां टेंशन पैदा होऐ। अपनी इक सोशल मीडिया पोस्ट च उमर अब्दुल्ला होरें आखेया ऐ जे जम्मू-कश्मीर सरकार भारत सरकार दे विदेश मंत्रालय दे नेडमें सम्पर्क च ऐ- तांजे ईरान च मजूद जम्मू-कश्मीर दे विद्यार्थियें ते होरनें नागरिकें दी सुरक्षा गी जकीना बनाया जाई सकै। उंनें आखेया जे हालात पर नेडमी तक्क रक्खी जा करदी ऐ।

<><><><><><>

Drone -Poonch

पुंछ जिले च कब्जा रेखा दे पारा थमां अज्ज बड्डुलै भारती इलाके च दाखल होए दे इक पाकिस्तानी ड्रोन पर फौज दे सौहगे जोआनें गोलीबारी कीती। आकाशवाणी दे जम्मू संवाददाता दी रिपोर्ट मूजब- पुंछ जिले दे दिगवार इलाके च किश चिर मंडराने परैन्त एह ड्रोन वापस पाकिस्तान बक्खी चले गेआ। पिच्छले त्रंऊ दिनें च एह दुई बारी ऐ जिस्सलै सुरक्षाबले- बन्ने पारा थमां ड्रोन गतिविधि दा पता लग्गने पर ओदे पर गोलीबारी कीती ऐ। अधिकारियें मूजब अगेत्री चौकी पर तैनात जोआनें बड्डुलै तकरीबन 6 बज्जियै 10एं मिन्टें पर दुश्मन दा ड्रोन दिक्खेया ते उसी मारी सुट्टने लेई इक दर्जन राउंद गोलियां चलाइयां। ऊआं एह ड्रोन गोलियें थमां बचियै वापस बन्ने पार चली गेआ ते एहदे तुरत मगरा इलाके च इक तुपाई अभियान रम्भी दिता गेआ।

<><><><><><>

Holi Celebration

औंदे “होली” दे त्योहार दे मद्देनजर बजारें च खासी रौनक दिक्खी जा”रदी ऐ। बजारें च पर्यावरण अनुकूल रंग- मठाइयां ते होर दुआ समेयान थाहरें-थाहरें बिक्री लेई लब्भा रदा ऐ-जिसी लोक खास करी बच्चें चा-चा कन्नै खरीदा रदे ना। प्रशासन नै लोकें गी अपील कीती ऐ जे ओह त्योहार दे मद्देनजर जारी दिशा-निर्देश दी पालमा करना।

तोंआई जम्मू-कश्मीर च लोक हुन सुरक्षित ते पर्यावरण अनुकूल त्योहारें आहली भेठा बदा”रदे ना। श्री गोकुल गौधाम उधमपुर दी मिसाल गी अपनादे होई लोक रसेन थवां मुक्त रंगें दा इस्तेमाल करा’रदे ना।



Chahat Felicitation

नमीं दिल्ली च “परीक्षा पे चर्चा -2026” च APS जंगलोट थमां जम्मू-कश्मीर दी नुमायंदी करने आली इकलौती विद्यार्थी चाहत गी राईजिंग स्टार कोर आसेया सम्मानित कीता गेआ। चाहत गी “परीक्षा पे चर्चा” कार्यक्रम दौरान प्रधानमंत्री नरेन्द्र मोदी हुंदे कन्नै गल्लबात करने दा सम्मान हासल होआ हा- जेहड़ा जम्मू-कश्मीर लेई बड़े मानै आली गल्ल ऐ। एह उपलब्धि होरनें विद्यार्थियें गी अपने लक्ष्यें गी हासल करने ते हुनर गी नखारने आस्तै राश्ट्री मंचें पर सक्रियता कन्नै हिस्सा लैने लेई प्रेरित करदी ऐ।



CS-SHA

मुख्य सचिव अटल डुल्लु होरें 17 अप्रैल 2025 थमां शुरु होए दे PMJAY सेहत दे मौजूदा नीति चरण तैहत हासल प्रगति दी समीक्षा करने लेई राज्य सेहत एजेंसी (SHA) दी 11मीं गवर्निंग काउंसल दी बैठक दी अध्यक्षता कीती। बैठक दौरान मुख्य सचिव होरें एजेंसी गी फर्जी ते झूठे दावें गी दूर करने लेई इक मजबूत ते तगड़ा सरिस्ता कायम करने लेई आखेआ। उ’नें जोर देइयै आखेआ जे इस गल्लै गी यकीनी बनाया जा जे सेही लाभार्थियें तगर लाह पुज्जी सकै। डुल्लु होरें जवाबदेही बधाने आस्तै कुसै त्रीए धड़ें कोला निगरानी कराने आला सरिस्तें कायम करने दे महत्व उप्पर बी जोर दिता। माली संदर्भ च इस अवधि दौरान पैहले थमां गै मंजूर कीते गेदे दावें दी कुल रकम 6 सौ छयाठ करोड़ 34 लक्ख रपे ऐ।

Earth Quake -Doda

डोडा जिले च अज्ज बडुलै 4 इशारिया 2 दी तीव्रता दा भूचाल आया। मौसम विभाग दे इक अधिकारी नै दस्सेआ जे भूचाल दे झटके बडुलै 1 बज्जियै 25एं मिन्टें पर महसूस कीते गो। भूचाल दा केन्द्र धरती दी सतह कोला 5 किलोमीटर हेठ हा। आकाशवाणी दे जम्मू संवाददाता नै जानकारी दिती ऐ जे कुतै बी कुसै चाली दे जान-माल दे नुक्सान दी कोई खबर नैई ऐ।

<><><><><><>

Prog. Announcement

आकाशवाणी दे क्षेत्रीय समाचार एकांश जम्मू आसेया औंदी 3 मार्च गी “विश्व वन्यजीवन” ध्याड़े दे मौके पर दपैहरी 12 बजे 25 मिनटें दी अवधि आला इक खास कार्यक्रम प्रसारित कीता जाहगा। इस बशेश कार्यक्रम दा विशे-सार होग: “औषधीय ते खशबूदार पौधे- सेहत- विरासत ते आजीविका दा संरक्षण”। इस कार्यक्रम च साढे परौहने होडन, जंगलात मैहकमे दे असिस्टेंट कंज़रवेटर अमित शर्मा जेहड़े इस विशे पर अपने माहिराना बचार सांझे करडन। इस कार्यक्रम दी मेज़बानी साढी न्यूज एंकर श्रुति खजूरिया आसेआ कीती जाहगा।

<><><><><><>

Traffic Regulations

उधमपुर जिला प्रशासन नै जिले च भीड़-भाड़ गी रोकने दे मकसद कन्नै ट्रैफिक सरबंधी सख्त नियमें गी लागू कीता ऐ- जेहदे तैहत मुख-मुख थाहरें पर निजी चार टैरी गड्डियें पर रोक बी शामिल ऐ। जिला प्रशासन आसेआ एह हुकम जंदी 25 फरवरी गी लागू कीता गेआ ऐ। इनें पाबंदियें तैहत सलाथिया चौक थमां रामनगर चौक होंदे होई जिला अस्पताल दे पिच्छले गेट तगर बडुलै 11 बजे शा लेइयै रातीं 8 बजे तगर निजी चार-टैरी गड्डियें- टैक्सियें ते हौली मोटर गड्डियें गी जाने दी इजाजत नैई ऐ।

<><><><><><>

JKRLM Ramban

रामबन जिले च जम्मू-कश्मीर ग्रामीण आजीविका मिशन उम्मीद योजना दे तैहत महिलायें गी बाइख्तेयार बनाने लेई नमें आप-सहायता समूह खडेरे जा'रदे न। केन्द्र सरकार आसेआ प्रायोजित इस योजना दा मकसद माली समावेशन गी बधाना ते रोज़ी-रुट्टी कमाने दे टिकाऊ विकल्प उपलब्ध करोआना ऐ। एह आप-सहायता समूह बक्ख-बक्ख बैंकें कन्नै जुडे दे न जेह्दे नै सौक्खे दोआर-कर्जे हासल करने च मदाद होंदी ऐ ते कन्नै सरकार बी उन्दे उत्पादें लेई नमें मंच कायम करियै उनेंगी मदाद उपलब्ध करोआंदी ऐ।

